

吳橋縣志卷十

雜記志

考辨

河渠考

古九河地

禹貢 濟河惟兗州九河既道

通鑑綱目 周宣王五年秋河徙

綱

西漢書曰王橫言周譜

云宣王五年河徙則今所行非禹所穿也

目

西漢溝洫志 許商以為古說九河之名有徒駭胡蘇鬲津

今見在成平東光鬲界中自鬲以北至徒駭間相去二百餘

吳橋縣志

卷十

雜記志 考辨

一

里今河雖數移徙不離此域 賈讓奏言隄防之作近起戰

國壅防百川各以自利齊與趙魏以河為竟趙魏瀕山齊地

卑下作隄去河二十五里河水東抵齊隄則西泛趙魏趙魏

亦為隄去河二十五里雖非其正水尚有所游盪時至而去

則填淤肥美民耕田之或久無害稍築室宅遂成聚落

水經注 齊桓霸世塞廣田居同為一河漢世常欲求九河

故跡而川之未知其所是以班固云自茲距漢北亡八枚者

也

按河自周定王南徙九河故跡漢已不可得識矣在吳橋者  
曰鈞盤亦今河而被以古名也曰老黃河亦以其槩言之也  
地理今釋謂經吳橋者為鬲津而許商又謂鬲津最南下流  
甯津又曰胡蘇是皆不可執者總惟九河故道云耳抑周定

五年河徙而周定在齊桓之後其或因桓之塞水不能容乃橫溢與齊與趙魏東西各作隄防則漢大河之經行卽因是道與漢去古未遠所言似未可厚非故備錄諸說以俟考証

漢

大河

卽今運河

屯氏別河北瀆

今鉤盤河老黃河沙河

漢書溝洫志 孝武元光中河決於瓠子東南注鉅野通於淮泗上使汲黯鄭當時興人徒塞之輒復崩壞後二十餘歲歲因以數不登而梁楚之地尤甚上旣封禪巡祭山川其明年乾封少雨上乃使汲仁郭昌發卒數萬人塞瓠子決河於是上以用事萬里沙則還自臨決河沈白馬玉璧令羣臣從官自將軍以下皆負薪實決河是時東郡燒草以故薪柴少而下淇園之竹以爲榿上旣臨河決悼功之不成迺作歌於

吳橋縣志

卷十

雜記志 考辨

一一

是卒塞瓠子築宮其上名曰宣防而道河北行二渠復禹舊跡而梁楚之地復甯無水災自塞宣房後河復北北於館陶分爲屯氏河東北經魏郡清河信都勃海入海廣深與大河等故因其自然不隄塞也此開通後館陶東北四五郡雖時小被水害而兗州以南六郡無水憂 元帝永光五年河決清河靈鳴犢口而屯氏絕 王莽時徵能治河者以百數但

崇空語

水經 大河故瀆又東逕平原縣故城西而北絕屯氏三瀆北逕繹幕縣故城東北西流逕平原鬲縣故城西大河故瀆又北逕修縣故城東又北逕安陵縣西

注又東北至東光縣故城西而北與漳水

合流

屯氏別河北瀆東經繹幕縣故城南東絕大河故瀆又東北逕平原縣枝津北出至安陵縣遂絕 屯氏別河北瀆又東

北逕重平縣故城南屯氏別河北瀆又東入陽信縣今無水

按桑欽水經作於宣房築屯氏河分之後所謂大河故瀆修縣東安陵縣西至東光合漳水者今運河道也屯氏別河北瀆今老黃河鉤盤地也枝津北至安陵者今沙河地也又老黃河及沙河俗皆稱王莽河意元帝時屯氏河絕成帝初馮遂奏復屯氏河王莽多徵治河者曾因其舊疏濬之與

### 東漢 德棣八河

通鑑綱目 明帝永平十二月夏四月修汴渠隄綱 初平帝

時河汴決壞久而不修建武十年光武欲修之浚儀令樂俊

## 吳橋縣志

### 卷十

雜記志 考辨

三

上言民新被兵革未宜興役乃止其後汴渠東浸日月彌廣充豫百姓怨歎會有薦樂浪王景能治水者夏四月詔發卒數十萬遣景與將作謁者王吳修汴渠隄自滎陽東至千乘海口千餘里十里立一水門令更相洄注無復潰漏之患雖簡省役費然猶以百億計焉目 十三年夏四月汴渠成綱 河汴分流復其舊跡目

余氏闕曰自周定王時河始南徙訖於漢而禹之故道失矣故西京時受惠特甚自瓠子再決流為屯氏諸河其後河入千乘而德棣之河又播為八漢人指以為太史馬頰者偶合於禹跡故訖東都至唐河不為害者千數百年至宋而河又

南決乃由彭城合汴泗東南以入淮

按河人千乘後此地當為德棣八河之一二特未能有所攷定主名耳

隋 永濟渠 今運河

隋書煬帝紀 大業四年春正月乙巳詔發河北諸郡男女百餘萬開永濟渠引沁水南達於河北通涿郡 七年帝自

江都行幸涿州渡河入永濟渠

唐 永濟渠 今運河 古毛河 今老黃河 靳河 今沙河

唐書地理志 滄州景城郡清池縣西北五十五里有永濟

隄永徽二年築南十五里有浮河隄開元十六年築 景州

東光縣南二十里有靳河自安陵入浮河開元中開 南皮

吳橋縣志 卷十 雜記志 考辨 四

縣古毛河自臨津經縣入清池開元十年開

顏師古漢書注 屯氏河隋室析州縣誤以為毛氏河乃

置毛州失之甚矣

按清池今之廢滄州在今滄州東南所云永濟隄正今衛河地永徽為高宗年號則此地即隋所開之渠而地理志所記貴鄉縣開元二十八年刺史盧暉徙永濟渠自石灰窠引流至城西注魏橋以通江淮之貨者乃即其一處言之無關此地也今沙河由吳橋入東光城南下通滄州當即安陵由東屯氏河北瀆由甯津入南皮正當其地則唐之古毛河即漢之屯氏河而今吳橋之老黃河也

宋 御河 今運河黃河亦嘗由此 赤河 老黃河

宋史 慶歷八年六月河決商胡掃 皇祐元年三月河合

永濟渠注乾甯軍 嘉祐五年河流派別於魏之第六掃曰

二股河其廣二百尺自二股河行一百三十里至魏恩德博之境曰四界首河七月都轉運使韓贄言四界着古大河所經卽溝洫志所謂平原金隄開通大河入篤馬河至海五百餘里者也自春以丁壯三千浚之可一月而畢支分河流入金赤河使其深六尺爲利可必商胡決河自魏至於恩冀乾甯入於海今二股河自魏恩東至於德滄分而爲二則上流不壅可無決溢之患乃上四界首二股河圖 神宗熙甯元年六月河溢恩州烏欄隄又決冀州棗強掃北注瀛七月又溢瀛州樂壽掃 二年七月二股河通快北流稍自開張鞏奏東流勢漸順快宜塞北流除恩冀深瀛永靜乾甯等州軍

吳橋縣志

卷十

雜記志 考辨

五

水患又使胡盧河御河下流各還故道 八月北流閉熙甯四年十月溢衛州王供時新隄凡六掃而決者二下屬恩冀貫御河奔衝爲一帝憂之自秋迄冬數遣使經營 五年水入二股河決口塞 元豐四年四月水吳掃復大決自澶注入御河恩州危甚六月戊午詔東流已填淤不可復將來更不修閉小吳決口候見大河歸納應合修立隄防令李立之經畫以聞 五年九月河溢滄州南皮上下掃又溢清池掃 元祐二年右司諫王覲言今河之爲患三泛濫涇瀆漫無涯涘吞食民田未見窮已一也緣邊漕運獨賴御河今御河淤澱轉輸艱梗二也塘泊之設以限南北濁水所經卽

爲平睦三也 紹聖元年王宗望言奉詔凡九月盡障北流使全河東還故道 二年六月河決內黃口東流遂斷絕八月詔大河水勢十分北流其以河事付轉運司責州縣共力救護隄岸 崇甯四年尙書省言大河北流合西山諸水在深州武強瀛州樂壽掃俯瞰雄霸莫州及沿邊塘灤萬一決溢爲害甚大詔增二掃隄 政和五年都水使者孟揆言大河連經漲淤灘面已高致河流傾側東岸今若修閉棗強上埽決口其費不貲今漫水行流多鹹鹵及積水之地又不犯州軍止經數縣分迤連纏御河歸納黃河欲自決口上恩州之地水隄爲始增補舊隄接續御河東岸簽合大河從之

吳橋縣志

卷十

雜記志 考辨

六

御河源出衛州共城縣百門泉自通利乾甯入界河達於海熙甯二年劉燾程昉言二股河北流今已閉塞然御河水由冀州下流尙當疏導以絕河患 元豐五年提舉河北黃河隄防司言御河狹隘隄防不固不足容大河分水乞令綱運轉入大河而閉截徐曲旣從之矣明年戶部侍郎蹇周輔復請開撥以通漕運及令商旅舟船至邊岸大抵自小吳掃決大河北流御河數爲漲水所冒亦或湮沒哲宗紹聖三年四月河北都轉運使吳安持始奏大河東流御河復出詔委前都水丞李仲提舉開導徽宗崇甯元年冬詔開臨清縣壩子口增修御河西隄高三尺并計度西隄開置斗門決北京恩

冀滄州永靜軍積水入御河枯源 政和五年詔於恩州北

增修御河東隄

按運河在宋實為御河自皇祐元年河合永濟渠注乾甯軍遂又為黃河經行之地然史言商胡決河自魏之北至恩冀乾甯入海是謂北流嘉祐中河流派於魏之第六掃遂為二股自魏恩東至德滄入海是謂東流御河特大河分水所經或帶入大河失其故道通志謂即黃河北河各還故道而三年劉燹程防奉命開烏欄隄東北至大小流港橫截黃河復故道則前此御河固不由故道也而熙甯元年河決冀州棗強瀛州樂壽知河固不由此地矣至四年河決新隄下貫御河旋經修塞元豐四年復大決小吳掃注入御河乃不更議修閉而御河志言自小吳掃決大河北流御河數為漲小所冒亦或湮沒元豐五年河溢滄州南皮永靜阜城諸掃隄防司言御河狹隘隄防不固不足容大河分水則御河固北流之分水而淤澱者且不知幾何矣大抵河北流復西徙南宮棗強深州武燹下至樂壽入乾甯軍其北流道也觀河決溢之地可以攷見至紹聖三年大河東流御河復出詔李仲提舉開導崇甯元年詔開臨清壩子口增修御河西隄乃

吳橋縣志

卷十

雜記志 考辨

七

金

永濟渠

亦曰

舊黃河

今運

河

今運河之道政和中自決口上恩州之地水隄為始增補舊隄接續御河東岸簽合大河則御黃河合流而金史所云舊黃河行恩州景州滄州會州之境者當以此言之若遂為黃河北流恐未深攷矣

又按甯津胡蘇河寰宇記云一名赤河嘉祐中韓贄言開通大河入篤馬河支分河流入金赤河篤馬河即東流在今陵

縣地而支分入赤河蓋即老黃河

下通甯津者與附識以俟博攷

金史地理志 景州吳橋縣有永濟渠

金史河渠志 通漕之水舊黃河行滑州大名恩州景州滄

州會川之境漳水東北為御河則通蘇門獲嘉新鄉衛州濬

州黎陽衛縣彰德磁州洺州之境 泰和六年尚書省以凡

漕河所經之地州縣官以為無與於已多致淺滯使綱戶以

盤淺剝載爲名奸弊百出於是遂定制凡漕河所經之地州府官銜內皆帶提控漕河事縣官則帶管勾漕河事俾催檢網運營護隄岸爲府三州十二縣三十三

內有吳橋茲不備錄

按通漕之水謂舊黃河政和中所修隄簽合者也卽永濟渠爲今運河又地理志將陵有鈎盤河將陵爲今德州在吳橋上流則今吳橋之鈎盤當宋時已有其名矣

元

御河

亦曰

運河

今運河

元史 至元三年七月都水監言運河二千餘里漕公私貨物爲利甚大自興兵以來失於修治清州之南景州以北頽闕岸口三十餘處淤塞河流十五里至癸巳年朝廷役夫四千修築浚滌乃復行舟今又三十餘年無官主領滄州地分

吳橋縣志

卷十

雜記志 考辨

八

水面高平地全藉隄堰防護其園圃之家掘隄作井深至丈餘或二丈引水以溉蔬花復有瀕河人民就隄取土漸至闕破走洩水勢不惟溢行舟妨運糧或致涇民居没禾稼部議以濱河州縣佐貳之官兼河防事於各地分巡視如有闕破卽率衆修治仍禁園圃之家母穿隄作井栽樹取土都省准議 延祐三年七月滄州言清池縣民告往年景州吳橋諸處御河水溢衝決隄岸萬戶千奴爲恐傷其屯田差軍築塞舊洩水郎兒口故水無所洩浸民廬及已熟田數萬頃乞遣官疏闢引水入海及七月四日決吳橋縣柳斜口東岸三十餘步千戶移僧又遣軍閉塞郎兒口水壅不得洩必致漂蕩



張管許河孟村三十餘村黍穀廬舍故本州摘官相視移文  
約會開關不從四年五月都水監遣官與河間路官相視元  
塞郎兒口東西長二十五步南北濶二十尺及隄南高一丈  
四尺北高二丈餘復按視郎兒口下流故河至滄州約三十  
餘里上下古跡寬活乃減水故道名曰盤河令爲開關郎兒  
口增濬故河決積水由滄州城北達滹沱河以入於海泰定  
元年九月興工十月工畢

按元史載清池縣西永濟河自南皮縣來入於清州亦名曰  
御河則御河亦卽永濟渠矣自元復修築浚滌以濱河佐貳  
官兼河防事而河流無滯此運河之在元者然也柳斜口今  
吳橋縣志無其名大抵吳橋運河東岸決率由東光下達滄  
州則所謂郎兒口減水故道卽今沙河之下流與  
其名曰盤河亦或因爲鈎盤下流故有是名也

### 吳橋縣志

### 卷十

雜記志 考辨

九

明 衛河

今運河

舊黃河

今鈎盤河  
老黃河

明史河渠志

黃河

白昂又以河南入淮非正道恐卒不能容

復於魚臺德州吳橋修古長隄又自東平至興濟鑿小河十

二道入大清河及古黃河以入海河口各建石堰以時啟閉

宏治  
三年

宋禮言衛輝至直沽河岸多低薄若不究源析流但務隄

築恐復潰決勞費益甚會通河抵魏家灣與土河通其處可

穿二小渠以洩於上河雖遇水漲下流衛河自無橫溢患德

州城西北亦可穿一小渠蓋自衛河岸東北至舊黃河十有

二里而中間五里故有溝渠宜開道七里洩水入舊黃河至

海豐大沽河入海詔從之

永樂五年

楊砥言吳橋東光興濟交

河及天津等衛屯田雨水決隄傷稼德州良店驛東南二十  
五里有黃河故道與州南土河通穿渠置閘分殺水勢大為

民便命侍郎藺芳往理之

永樂十年

按衛河為今運河白昂所修古長隄今城南隄也宋禮所開  
德州西北渠入舊黃河即今鉤盤河楊砥奏開德州東南渠  
入黃河故道者當是今老黃河白昂所鑿小河十二道在宏  
治年間其中或有此二河當亦因而疏濬之復加以石堰與  
舊志稱白昂於四女寺鑿裏寺至九龍口入舊黃河又似與  
楊砥所開不同者俟再查對但黃河於宏治七年即全行南  
徙不復北流此特頂備  
之計河實未嘗經此

### 安陵辨

王 奂

人物各產其方貴於存信豈可因地名偶同遂引他方之賢入

## 吳橋縣志

### 卷十

雜記志 考辨

十

風馬牛不及之地哉景州東光舊有安陵名舊志撰人物遂取  
六國縮高漢馮唐並載志中不知安陵有三一在河南漢書括  
地志潁川郡鄆陵縣六國為安陵屬魏此縮高之所以為安陵  
人也一在陝西西漢安陵縣屬右扶風漢惠帝陵邑此馮唐之  
所以為安陵人也若夫渤海郡之安陵則曰東安陵縣晉時置  
加東以示別也與縮馮二公無涉矣觀縮高子為管守信陵君  
遣使之安陵君屬遣縮高以攻管安陵君曰吾先君成侯受詔  
襄王以守此土也手受太府之憲曰子弑父臣弑君有常刑今  
高謹修詞大魏以全父子之義而君曰必生致之是我負襄王  
之詔而廢大府之憲也襄王梁惠王子戰國景州東光屬趙史

稱趙割河間以事秦又樂毅奔趙封之觀津今東光也無所謂安陵者且趙至武靈始稱王其先簡子襄子止曰簡襄主是襄王爲魏王而縮高爲魏臣其爲鄢陵人無疑矣漢右扶風之屬置安陵以其爲帝陵故佞幸籍孺閎孺徙家焉示親暱也袁盎父徙家安陵盎家居梁王使客入關中刺殺盎安陵郭門外馮唐大父趙人父徙代漢興徙安陵不聞其轉徙何地也是安陵在漢最著豪右多居之而唐之家安陵自先人以來爲日入矣豈若渤海之安陵晉置而北魏因之隋大業間併入東光以後廢置不常烏得以千百年以前之人物濫載此土哉

附舊縣志 予始覽州志載安陵人者七戰國有安陵君及

## 吳橋縣志

### 卷十

雜記志 安陵辨

十一

縮高漢有馮唐弓林馬嚴馬敦唐有項仲山竊意安陵廢城吳蹟也則此數人者當爲吳產固欲采而錄之所謂逃空虛之谷聞人足音而喜耳旣而參考圖志乃見長安之安陵然後喟然嘆曰嗟大此州志之訛也予尚可踵其訛哉夫安陵君成侯受詔於魏襄王彼固魏邑也縮高亦魏人不宜入齊趙志明矣弓林與平陵方望同事仲山飲馬渭水嚴敦兄弟居鉅下三輔平陵渭水三輔地皆在長安去此千百里惡可以此之安陵而冒合之馮唐墓亦見長安古蹟蓋其大父趙人父居代漢徙安陵載在史記者足徵也然則唐亦豈此地人物哉特因其大父而係籍於趙則可謂云爾已矣外僑寓

者李白李頎二人按其所謂安陵橋者亦決非此之安陵可知也夫志核實不實則誣誣非所以傳信也

按安陵之辨甚悉但謂景州東光舊有安陵之名亦屬未考愚嘗辨之附錄於此縣志言吳橋與景州分昔安陵之半府志又言景州東光皆有安陵之名而安陵爲今景州殆非也吳橋自大半爲安陵地其安陵未盡爲吳橋者當與德州共之景州無安陵也隋併安陵入東光唐武德問旋復析置是東光已無安陵矣宋移將安陵於長河而省安陵入之長河爲今德州治其北由柘園至安陵鎮皆德州地景州城東三五里卽德州界蓋昔將安陵之交錯者也至今立吳橋乃南割將陵西北統有舊安陵地所不盡者或今德州運河東西地耳於景州乎何與其謂安陵爲景州者徒以今安陵鎮半屬景州不知古今立鎮多爲兩屬接界之所如今連窩爲吳橋驛而河西屬景州市北屬東光後日亦將謂吳橋地半入景州東光平從來疆犬牙相制勢難均齊方正古祇有省安陵入將陵之文并無省入景州者景州何得與也然則吳橋爲將陵亦應金以前言之觀金河渠志漕運所經由故城而將陵而吳橋是吳橋既立而將陵自在也蓋德州在金爲將

### 吳橋縣志

### 卷十

雜記志 安陵辨

### 十一

陵在元爲陵州而古德州寔今陵縣後乃互晏其名焉知將陵之爲德州則知安陵之爲吳橋固應以將陵還德州而以安陵還吳橋景州固無與也夫

吳橋本漢將陵地漢宣帝以封外家史氏晉武於此置縣所清東安陵吳橋舊志言漢置安陵非也今縣東南三十里趙寨鎮北有將陵故城縣西北二十里有東安陵故城址並存將陵今山東陵縣距吳橋境壤尤近明縣地在昔本屬平原郡矣吳橋名鎮在邑人傳爲古大姓吳氏所族居或曰燕吳王慕容垂常引兵經過此橋故稱吳橋志無稽焉自金置縣至明崇正初已四百餘歲當城中遠隱然猶有古隄斷岸之勢掘地在多得方磚巨瓦出卽埋之父老謂此卽吳橋處也城

外 大河南岸舊有橋傳爲吳橋南頭與城中橋址南北封值相玄凡二里郡志

按郡志吳橋本漢將陵縣屬平原郡後漢省晉以其地爲東安陵縣屬渤海郡後魏惟稱安陵縣隋大業中併入東光唐初復置安陵縣屬觀州貞觀十七年以屬德州景福元年隸景州後周時置保順軍宋太祖開寶三年以滄隸二州界保順吳橋二鎮之地益焉隸於滄州金世宗初年慶保順軍始以吳橋鎮地置吳橋縣隸河間府景州元屬河間路明屬河間府今隸屬同於明時

吳橋縣志

卷十

雜記志 安陵辨

十三

災祥

漢

鴻嘉四年秋河水溢害渤海清河信都灌縣邑三十敗官亭民舍四萬餘所

獻帝初平二年黃巾賊轉寇渤海校尉公孫瓚與戰於東光大

破之

郡志

管輅至安德令劉長仁家有鳴鵲來在閣屋上其聲甚急輅曰鵲言東北有婦昨殺夫牽引西家人夫離妻侯不過日在虞淵之際告者至矣到時果有東北同伍民來告鄰婦手殺其夫詐言西家人與夫有嫌來殺我壻劉長仁有辯才初開輅

吳橋縣志

卷十

雜記志

災祥

十四

能曉鳥鳴每見難及有鳴鵲之驗乃服

漢季書

魏

延康元年夏四月丁己饒安縣言白雉見賜饒安田租渤海百姓牛酒大舖三日

晉

大甯元年三月庚戌饒安東光安陵三縣災燒七千餘家死者萬五千餘人

東晉

元帝初樂陵大守邵續屯馱次綏懷流散趙領等率廣川渤海千餘家歸續續使部將進築河間以拒石勒

郡志

按此尚王浚所置愍帝二年勒襲陷薊殺浚續乃附勒旋歸  
晉為平原太守又為冀州刺史元帝太興之年勒遣石虎攻  
冀州遂入於趙此  
請元帝初疑有誤

### 北魏

宣武帝延昌四年冀州德門法慶以妖幻惑眾作亂自號大乘

詔光祿大夫元瑤討平之

綱目 郡志作瀛  
州刺史宇文福平

孝明帝孝昌三年葛榮陷冀州四年九月爾朱榮討擒之冀定

滄瀛殷皆平

### 隋

大業七年修人高士達起兵清河稱東海公以竇建德為軍司

馬十二年太僕楊義臣擊斬士達建德收其眾還屯平原勢

## 吳橋縣志

### 卷十

雜記志 災祥

### 十五

復振十三年稱長樂王襲破薛世雄軍芝都樂壽國號夏改

元五鳳河北郡縣爭附唐武德四年平

### 唐

永徽二年大水移建安陵縣城白社橋

見舊  
唐書

開成三年河北等處蝗草木葉皆盡

元和七年大稔

### 唐

元宗天寶十四載安祿山反以劉道元擾景城太守清池尉賈

載鹽山尉穆甯共斬其首攜謁長史李暉送詣平原與清河

尉張澹河間司法李奐等共推顏真卿為盟主十五載史思

明攻陷之肅宗至德二載思明降

文宗太和二年李同捷拒命三年橫海節度使李祐帥諸道兵擊同捷拔德州同捷請降滄景平

昭宗光化元年劉仁恭取滄景德州

光化三朱全忠遣兵拔德州圍滄州李克用救之

梁

太祖開平三年劉守光攻克滄州殺其兄守文梁主瑱

貞明元年晉拔德州二年拔滄州

五代後唐

天成三年河北大稔斗米十錢

吳橋縣志

卷十

雜記志 災祥

十六

宋

淳化三年滄州等蝗蛾抱草自死

熙甯二年滄州數路地震有一日十數震有踰半年不止者

金

宣宗貞祐元年蒙古主自將由中道取清滄景獻等二十一郡

三道凡破九十餘郡金帛子女牛馬羊畜皆席卷而去

興定四年紅襖賊寇樂陵轉掠河間橫海節度使王福敗之

封王福滄海公隸以吳橋等十一州縣八月王福降宋張林

五年張林降蒙古元光元年宋知濟南府种贇討張林敗走

之



貞祐四年河北行省侯摯言河北人相食觀滄等州斗米銀十  
餘兩

元

皇慶元年九月河間等路進嘉禾異畝  
莖數穗者命

集賢學士趙孟頫繪圖藏秘府

泰定二年德景等州縣蝗

至順二年景獻等八州蟲食桑為災

順帝至正十七年詔天下團結義兵路府州縣正官皆兼防禦  
使

至正十八年宋毛貴破濟南路攻董搏霄於南皮搏霄死之淮

吳橋縣志

卷十

雜記志 災祥

十七

南淮北等處義兵都元帥同知張誼提兵復吳橋

見孫公廟碑為十一

年夏四月以史考之當是二十一年  
蓋毛貴亂後察罕鐵木耳恢復時歟

明

洪武元年大將軍徐達取河間等地皆下之

洪武二十八年德州太水壞城垣

吳橋正當下流

建文二年燕兵襲滄州遂渡河過德州

按此在十月是年五月已陷德州八月旋復

永樂十年十一月吳橋決隄傷麥

正統五六年連歲蝗

天順三年四月河間濟南連日烈風麥苗盡敗

成化十八年八月衛漳滹沱並溢自清平抵天津

俱見明史

成化二十二年有年 郡志

正德六年賊劉六劉七等奉楊虎為渠帥引眾攻河間州縣劫

掠甚眾 黃公堂說賊不攻城即此時

正德七年六月黑晝見河大者如犬小者如貓夜出傷人有至

死者形赤黑風行有聲居民夜持刁斗相警達旦踰月乃

十一月地震

正德九年河間諸州縣蝗食苗稼皆盡所至蔽日人馬不能行

民捕蝗以食或曝乾積之又盡則人相食

嘉靖二年兩京山東等七省旱赤地千里殍殮載道 明史

嘉靖三十九年飛蝗蔽天食禾殆盡

吳橋縣志

卷十

雜記志 災祥

十八

萬曆三年大有年

萬曆三十九年大水穀貴甚

萬曆四十一年大水

萬曆四十一年冬甯津盜大起明年九月官兵討平之

天啟二年武邑白蓮妖賊于宏志作亂逼近吳橋范文忠公請

天津援鄒滕兵討之

秋有大盜集連鎮邑官兵圍向莫敢前開原鄭揮使名之麟

值此率三五健兒直前捉之大眾隨進盡擒之王公允長贈

之以詩浩氣橫定暗陣雲直前探穴奏兵勳霜明巨劍狼驚

隊鳳勁深弓豕殪羣脫穎何人識國士清纓此日見飛軍還

期振旅湖湘下淨埽妖氛警不聞

崇正四年閏十一月丁卯登州遊擊孔有德率師援遼次吳橋南關反欲攻城黃生騰龍周生櫝說心之還陷陵縣臨邑商河等縣十一年

大清兵入吳橋知縣李綦隆棄城走訓導劉廷訓死之

崇正十三年旱甚斗米銀二兩人相食

崇正十四年大旱飛蝗蔽天死徙流亡畧盡

崇正十五年民間異疾作且染人親友至不敢弔問

郡志

范文忠公爲諸生時游京師與太學李生交及公會試復至往訪李李先借居一貴人園有女狐來狎久若夫婦一日狐與

## 吳橋縣志

### 卷十

雜記志 災祥

### 十九

李云當暫避草頭人迄曉狐忽不見聞叩戶者啟之則文忠也李方悟草頭人爲范字心訝之然不以告及公別去向夕則狐又在生榻矣因問之何爲畏彼狐曰彼爲大貴人須稍避之李復問已名位何如曰亦大貴李曰然則何不畏我曰

彼鍾氣甚正子安得望彼故不畏耳李後常與人言之

筆剩

范文忠公鎮通州時署後樓久有怪人不敢居公秉燭正坐闢門待之夜半有誼聲遠來甚異近乃寂然忽一物人戶見公若懼不敢退膝行至前向匍匐狀公舉筆點其額怪遂出亟使人迹之入庫中啟視一大鼓上有朱點劈之則已血凝半腔矣自是怪遂絕

大王廟去城東十二里廟前楊樹一株大可雙合抱高十餘丈  
蓋數百年物樹有龍爪痕五自下直上至頂皆寬深數寸傳  
舊時有龍起樹下似攫妖物者至今其跡宛然皮肉焦不能  
合他處自茂盛

張闇然居張仙廟幼時過鄰村其村人夜夢神謂曰明晨有貴  
人過門前不潔當掃除之醒而復寐夢復然異之晨起掃除  
覘候而過者張也於是衆嘖嘖謂張氏子當大貴後順治元  
年拔成均以知縣終

國朝

順治十一年冬大雪封戶人至不能出入多凍死者

吳橋縣志

卷十

雜記志 災祥

二十

國初有牟姓者貧無賴一日夜歸見路卧一貓色白可愛因置囊  
中負以歸夜半忽作人聲語牟曰我狐也醉卧現形爲君所  
執倘釋我將爲君致富以報牟詢所以曰我能爲人作崇我  
前行使病君隨醫之自應手愈以是索厚謝富可立致也牟  
始懼且疑繼思已方赤貧盍試之乃與盟旦曰試之附近村  
鄰果然自近而遠歷試之無弗然者由是而山東河南山陝  
遼陽逾千百里所至皆獲厚貲隆隆然富矣乃復神異其說  
謂牟尼佛本姓牟今復投生牟家實卽如來轉身普濟世人  
風親信者倡立梵宇遠近爭輦致木石爲助營構不數年巍  
峩輝煌稱大叢林四方進香頂禮有逾千餘里至者定期正

月十月進香二次因立會場復收其香資場資以爲利周寺置僧舍十二院以待進香者自於大殿側作小樓爲會衆說法所下開地道通其家客來令先居院中齋戒越宿後見使院中僧詢其居止姓名道途景况密各報知次晨見則呼其名或驟談其途中事雜以詭異之說以動之衆驚以爲前知不知實院中僧告之也見後復引至其家已乃先從地道中趨赴比客至而已先矣益共驚以爲神目爲活佛土人知其底裏者窃笑之咸呼之爲牟三道云幼未讀書不通文義募一道士藏窟室中代纂經一卷曰還宗教謂牟尼復生牟尼也中多剽竊他經語然殊雜亂不堪而信奉者競供誦之時

吳橋縣志

卷十

雜記志 災祥

二十一

國初法綱尙疎幸未獲罪乾隆初年大憲聞知焚其經并其寺毀之至戊戌己亥間山西省有以習還宗教事發奉查行文到縣而毀除已久矣遂不究亦始終之幸也初牟未有家室後携一婦人歸謂途遇衆持鍾掘土是婦叩頭乞甚哀問之乃婦近不謹其父母翁姑將生瘞之牟遂乞其餘生爲已婦衆棄之去戒婦勿道兩家姓氏以其色白如雪遂改姓雪衆呼爲雪奶奶人疑卽前狐所化云

康熙二十四年歲稔

康熙二十八年旱

康熙四十二年五月大雨水陸地行舟

康熙四十七年旱飢

康熙六十年大旱至六月始雨是後夜雨晝晴晚禾大熟

康熙間有杜紳者頗豪富居城東白楊村夏夜微雨有龍入所居樓中自下而上出譙屋盤女墻角火焰灼然更夫疑失火急以盆水撲之龍乃墜天井中震雷騰上大雨如注共驚起燃燈視之窗櫺有破紙痕透樓板而上有孔僅容指四圍若火燒者時溽暑多眠樓上其孔在眠榻旁所爭數寸耳屋門一扇劈如牙杖插頂隔紙上殆徧且勻甚下布地黑屑寸餘氣如硫黃撲鼻薰人一侍女倒置門旁不省人事救甦問之云見一黑人甚長兩目炯炯迎門際乃爲所持卽驚迷不自

吳橋縣志

卷十

雜記志 災祥

一一二一

覺焉自是其家遂衰

雍正元年四月初七日午後黑風驟起瞬息如晦

雍正二年大有年

雍正八年 月大雨雹屋瓦皆損人畜有傷死者

雍正八年秋大雨雹時城西李莊民人生一子墮地卽能言涕泣謂此非我家也問之其家住城南花園年十餘歲時自場歸遇雹仆他起卽來此來時猶見其父苦棗屋上訪於城南果然父心惡之飲以黑狗血遂不復記憶云

雍正十一年六月二十四日大雨如注一晝夜民屋垣多倒塌

平地可舟行百餘里

乾隆八年大旱炎風如災人多暍死

乾隆十一年五月十三日大雨雹晚禾有秋

乾隆十三年歲稔

乾隆二十六年德州河決入鉤盤沿堤危甚溝店舖堤決灌城

東北數十村

乾隆三十九年旱

乾隆庚申年有訛言自京中來謂十一月當地震屋居防傾墜

一時譁然競爲穹廬結草棚甚或露處以待實不驗也

城南李家莊有李姓者素奸黠好搬鬪是非一日醉歸見村前墳樹下數兒聚賭往捉之羣兒起與搏一婦人自田中呼其

吳橋縣志

卷十

雜記志 災祥

一二十三

名數其舊事以詈視之則夙有嫌者某氏死已久矣乃悟是皆鬼也急奔歸而羣兒已攝其魂至鄰村齊家相謂是口惡已多矣引其舌結以繩繫廟柱上久不能解飢渴不可耐後偶得解逃歸而身僵卧床上不語不食已半月餘至是甦備語人乃不敢復至鄰村半載後死

乾隆戊子夏有妖術自南來能隱形割人髮辮或見鷄狗至前卽被割被割卽倒地不省人事逾時救甦仍病卧數天乃愈云亦有死者一時訛言百出人情洶洶相傳治法有符水有咒語有施葯者有傳方者人皆藏一符於髮辮中孺子至不敢使出門紛囂半月復北去婦人則割衣襟情狀相類而灾

被割在亦無幾間有欠債者逃學者子弟奴僕獲咎者借圖免亦不盡災也

嘉慶二十五年冬大雨雪

道光元年正月鉤盤河決水及城下

道光八年七月地震

道光二十六年七月有白氣見於西方其長竟天

道光二十七年八月二十二日城西王温莊民人田景元之妻

辛氏一胎連生三男俱各存活經前縣李詳請上憲彙

奏蒙

恩准給米布

吳橋縣志

卷十

雜記志 災祥

一二十四

咸豐三年髮賊李開方林鳳祥由天津竄至連鎮至四年正月

僧邸勝帥及慶總鎮討平之

咸豐七年捻匪宋景詩自河西東來由城東溝店舖一帶南竄

鄉團與之接仗殺傷我鄉兵二百餘人南至朝城僧邸帥衆

討平之是年十月間有馬賊千餘自武彘棗強東竄渡河擾

及甯吳一帶河東數縣鷄犬爲之不甯者累月

咸豐七年十月三日晚有火起於甘石橋迤東路南溝中其光

燭天赫然直上及銀漢隱而弗見

按舊志未載災祥然天災流行何地蔑有孫益都所謂志匹夫匹婦占年望歲之心助田父牧豎牆陰之語者是亦不可闕也而特採國史地志中有係吳橋者並得之採葺以備一格而兵與異亦繼錄之



同治七年捻賊張總愚由保定饒湯安平率衆渡河而東在吳橋甯津鹽山南皮東光平原齊河等州縣蹂躪盤踞數月之久是時前縣王公恩照與同寅紳耆及城鄉百姓竭力困守孤城晝則分班瞭望夜則明燈傳籌無少倦怠彈丸蕞爾上下一心賊來窺覘數次搃未敢攻後經左宮保宗棠陳侍衛國瑞諸大臣追蹤撲滅而此數州縣之流離荒涼已不堪言矣

撰著

三皇五帝紀

列國世家

擊壤集

右明兵備副使李懿著

思本堂集

水部稿

水部詞

會奇類編

海上吟

吳橋縣志

卷十

雜記志 撰著

二十六

右明南甯府知府范永年著

開心札記

味元堂奏疏

師律

昭代武功錄

餐冰齋詩集

大臣譜

南樞志

石明東閣大學士范景文著

渾天儀說五卷

右明光祿李天經著吳邑舊志言天經纂崇正歷書考崇正  
歷書凡一百二十六卷大學士徐光啟使王應遴李之藻等  
共修者非獨天經爲之惟儀說五卷則其所自爲也

復初齋文集 復初齋詩集

右舉人滑縣教諭王作肅著

修修園詩稿

右內閣中書王履吉著

遺一春秋

九河臆說

冰雪齋詩稿

吳橋縣志

卷十

雜記志 撰著

一二十七

右候選縣丞王實堅著

大學講義

中庸狐白

右進士侯國正著

凌雲縣志

宦餘存稿

右同知季崇楷著

吳橋聞見錄

漱潤軒文集

漱潤軒詩集

右進士宣化府教授季炬著

冰玉齋詩稿

右范文忠公女弟王德啟嫡配范氏景姒著

續餘存稿

右進士季炬繼配邢氏著

吳橋縣志

卷十

雜記

二十八

金石

明

石刻二十塊舊存邑紳王氏處今歸瀾陽書院係明相國范文忠公禮部尚書董文敏公及米氏萬鍾遺跡古色斑駁洵爲至寶

磁盤

范文忠公家因園丁鑿窖得磁盤數十餘皆觸碎獨存其一質同古玉花欸極精青色透骨扣之作金石聲其製自何年亦無欸識大約數百年物也公自作古盤吟以詠之一時和者甚衆自公以大節殉國而此物亦如雲烟之過眼矣

吳橋縣志

卷十

雜記志 金石

二十九

識餘

城東無名莊以耕田掘得磁甕盆盎碗盞大小十數事餘多破碎獨一瓶完好如新但其式古拙磁色亦不甚精細惟以之養桃杏諸花能結實斯爲奇耳

文昌閣吳橋文昌閣舊在城東明知縣龔勉所建閣前有渠水二中黃石如魚形邑人因呼爲銅魚洲每科舉歲水聲潺湲異往時邑中必有得雉者

李省齋副憲勇退歸田及老知將歿以平生所積書數千卷送之學宮置之尊經閣以公於邑人使得皆讀之與若但以貽子孫苟不能讀空飽蠹蟲也其意勝人遠矣

吳橋縣志

卷十

雜記志 識餘

三十

劉珂於嘉靖二十年出行村里見有人坐樹下已而竟去遺物於地不覺也視之爲金二百珂知其必返尋乃坐樹下待之時腹且飢採桑葚食之卒不動比暮一人遑遽至狀若欲泣珂問爲誰曰吾某所解糧戶李全義也早間於此少息官銀二百遺不復見罪當如何矣珂曰無恐吾爲子守之待且久因出金還全義其人欲謝之笑曰吾不携之去顧須謝乎故城廬深在少時拾還遺金三百於通衢後又有失金者深再得之並以還其人與珂行畧同

明之中葉承平無事搢紳多好治園亭而任邱爲最外則吳橋范相國有瀾園李省齋有柏園而瀾園在當時爲最勝中有

聽秋閣快風亭榮木軒澄碧堂冰雪齋如石山房名流題咏  
甚衆復瀾園歸於其甥孫王作肅易名復園繪爲復園圖十  
二幅其門人楊萃爲之記

邑人周萬協登邑庠復游大學輕財好施康熙四十七年大饑  
施粥三月活數千人命邑宰杜公于藩題惠愛博施匾額以  
旌獎之有寒冷及死不能斂者悉與以衣棺行之終身無倦  
色

邑城東無名樹莊西一帶地中多碎磚瓦每雨後多有掇拾古  
錢及珠寶者又時至上元於其莊西登高遠望時有仙燈出  
現自南而北若連綴者然又其地有無名樹數株其樹似椿

吳橋縣志

卷十

雜記志 識餘

三十一

其葉似槐非槐似榆非榆其子似櫻桃而核甚大